

Program Jaringan Industri dan Masyarakat

Majlis Penyerahan Barangan Besbol kepada Sekolah-Sekolah Angkat Besbol dan Kelab Besbol tempatan telah diadakan pada 10 Mac 2018 yang bertempat di Mini Turf Hoki, Pusat Sukan UPM. Barangan Besbol ini telah dibekalkan oleh pihak Seibu Lions Baseball Club yang berpangkalan di Jepun. Penyerahan barangan sukan ini telah diserahkan kepada UPM sebagai agensi yang bertanggungjawab dalam membangunkan sukan Besbol di peringkat IPT dan negara. Majlis ini telah disempurnakan oleh Pendaftar UPM merangkap Presiden Persatuan Besbol Malaysia, YBhg. Dato' Wan Azman Wan Omar.



Karnival Sukan UPM 2018

Pusat Sukan meneruskan penganjuran kejohanan Karnival Sukan 2018 pada 10 dan 11 Mac 2018 bertempat di Kompleks Sukan, Pusat Sukan UPM. Tujuan utama karnival sukan ini diadakan sebagai menyediakan satu "platform" kepada masyarakat sekitar UPM khususnya untuk menyertai kejohanan sukan selain daripada menggayakan kehidupan dengan cara hidup sihat melalui sukan.

Antara sukan yang telah dianjurkan ialah Bola Sepak Bawah 10 & 12 Tahun, Liga Bola Sepak Penalti, Sepak Takraw Bakat Baru, Petanque Double Terbuka, Sepak Takraw Terbuka, Dart Individu, Ping Pong Novice dan Dart Double. Karnival ini telah mendapat sambutan yang tinggi di kalangan pelajar sekolah, komuniti setempat dan agensi sukan di semenanjung Malaysia dengan penyertaan seramai 2500 orang peserta untuk semua acara yang dipertandingkan.



Cheong Jun Hoong Olahragawati 2017



Majlis Anugerah Sukan Negara 2017 yang diadakan pada 13 Mac 2018 bertempat di Hotel Hilton, Kuala Lumpur telah mencatat sejarah buat UPM setelah Cheong Jun Hoong (atlet Terjun) telah dinobatkan sebagai Olahragawati Kebangsaan 2017.

Kejayaan beliau memenangi pingat Emas acara *10m Platform* dan pingat Gangsa *10m Synchro Platform* di Kejohanan "FINA World Aquatics Championship 2017" sekaligus telah mengangkat beliau untuk dinobatkan sebagai penerima anugerah tersebut.

Majlis Makan Malam Santai bersama Atlet Renang dan Olahraga

Pasukan Olahraga UPM meneruskan dominasi kecemerlangan setelah sekali lagi dinobatkan sebagai Johan keseluruhan dalam Kejohanan Olahraga MASUM 2018. Bagi menghargai kejayaan tersebut, Pusat Sukan UPM telah mengadakan Majlis Makan Malam Santai Bersama Atlet Renang dan Olahraga pada 16 April 2018 bertempat di Pusat Sukan UPM. Untuk rekod, pasukan Renang UPM pula dinobatkan sebagai Naib Johan Keseluruhan sempena kejohanan tersebut.



UPM Rai Atlet Komanwel 2018

Majlis Meraikan Atlet UPM ke Kejohanan Sukan Komanwel 2018 telah diadakan pada 3 April 2018 di Foyer Dewan Taklimat, Bangunan Pentadbiran UPM. Majlis ini bertujuan bagi meraikan dan membakar semangat atlet serta pegawai UPM yang akan mewakili Negara ke Sukan Komanwel di Gold Coast, 2018 bermula 9 hingga 15 April 2018. Seramai 27 orang atlet UPM yang telah menyertai pasukan Negara dalam sukan Hoki Lelaki (2 orang), Hoki Wanita (8 orang), Ragbi (7 orang), Olahraga (5 orang), Menembak (1 orang) dan Terjun (2 orang).

Selain itu, terdapat 2 orang staf UPM yang menyertai kontinjen Malaysia ke Gold Coast iaitu Muhammad Zyuraidi Abdul Majid selaku Pengurus Pasukan Ragbi 7's dan Muhammad Azwar Bakar yang mewakili Malaysia sebagai atlet Ping Pong. Lebih membanggakan UPM apabila atlet Olahraga (Lompat Kijang) Negara/UPM, Muhammad Hakimi Ismail telah diberikan penghormatan sebagai pembawa Jalur Gemilang sempena perasmian pembukaan temasya sukan tersebut.



Jalanan Ukhwah Melalui Sukan

Kejohanan Sukan Staf UPM 2018 telah bermula pada 9 April 2018 bermula dengan acara Bola Sepak dan Bola Jaring. Kejohanan ini diadakan bertujuan untuk mempererat lagi hubungan antara staf UPM dan juga mendidik staf UPM untuk menggiatkan aktiviti sukan sebagai aktiviti gaya hidup sihat dan melahirkan staf yang cerdas dan proaktif.



Keputusan Kejohanan Sukan Kolej UPM Semester 1, Sesi 2017/2018

Bil.	Sukan	Kategori Lelaki		Kategori Wanita	
		Johan	Naib Johan	Johan	Naib Johan
1	Bola Sepak	K6	KTDI	-	-
2	Hoki Lelaki	K6	K2	-	-
3	Bola Jaring	-	-	K6	K2
4	Lari Ganti2 Jalan Raya	K10	KTDI	KTDI	K6
5	Catur	K17	K2	K17	K12
6	Bola Tampar	KTDI	KTP	K17	KC
7	Bola Baling	K10	KTP	KTDI	K2
8	Tenis	K17	K10	K17	K11
9	Futsal	KTDI	K13	K6	K2
10	Petanque	KC	K2		
11	Sepak Takraw	K6	K2	-	-
12	Ragbi Sentuh	-	-	KTDI	K2



*Keputusan perlawanan sehingga 28 April 2018

Program Bual Bicara Bersama Pengulas Sukan Tanahair

Program Bicara Putra bersama Pengulas Sukan tanahair siri 1/2018 telah diadakan pada 24 April 2018 bertempat di Dewan Sri Pulasan, Kolej Keenam UPM. Program ini merupakan inisiatif Pusat Sukan untuk membawa ikon-ikon negara terutamanya dalam bidang sukan bertujuan memberikan pendedahan kepada atlet mahasiswa dalam meningkatkan kemahiran insaniah. Bicara Putra Siri 1/2018 ini telah menampilkan 3 orang Pengulas Sukan terkemuka tanah air dengan tema "Atlet Mahasiswa : Dilema Hari Ini, Cabaran Masa Depan".

Antara objektif yang ingin digarapkan melalui program ini adalah bagi mendedahkan pelajar tentang kepentingan pengurusan masa yang berkesan, mendedahkan tentang cabaran alam perkerjaan dan mendedahkan pelajar tentang cara berhadapan dengan media serta kepentingan publisiti media kepada atlet. Turut menghadiri program tersebut ialah YBhg. Prof. Dr. Mohd Roslan Sulaiman, Timbalan Naib Canselor Hal Ehwal Pelajar & Alumni UPM sebagai Tetamu Kehormat majlis.

Majlis Gemilang Putra & Sambutan Hari Pekerja 2018

Tahniah buat staf Pusat Sukan yang diberi penghargaan sempena Majlis Gemilang Putra & Sambutan Hari Pekerja 2018 yang telah diadakan pada 3 Mei 2018 di Dewan Besar, PKKSSAAS, UPM.

Penerima Anugerah Perkhidmatan Cemerlang (APC) Tahun 2017

Dr. Hanafiah Ayub A.M.N
(Ketua Pusat Sukan UPM)
Anugerah Perkhidmatan Cemerlang &
Anugerah Tokoh Pekerja
(Bukan Akademik)



Nor Haya Yaakob
Penolong Pegawai Belia & Sukan



Muzanna Muhamad
Pembantu Tadbir



Mohd Zalmie Jamlus
Pembantu Awam

Pasukan Futsal Wanita UPM Kekal Rentap Juara

Pasukan Futsal Wanita UPM meneruskan kecemerlangan dalam arena Futsal IPT setelah dinobatkan buat kali kedua berturut-turut sebagai Johan Futsal Wanita IPT 2018. Pasukan UPM telah menewaskan pasukan UM dengan skor 2-1 dalam perlawanan akhir Kejohanan Futsal Wanita IPT 2018 yang telah di adakan di Universiti Pendidikan Sultan Idris (UPS) pada 28 April 2018. Selain itu, pemain UPM, Nurul Shafizan Amran juga telah dinobatkan sebagai penjaring terbanyak kejohanan dengan 11 jaringan.

